

Der selben ging do Hercules noch  
Wollust / rüw / freud er allzyt floch /  
Wolt gott / als wir begeren all  
Leben noch vnserm wol gefall  
Das wir begerten ouch des glich  
Zu han / eyn leben dugentrich /  
Worlich / wir flühen manchen stäg  
Der vns furt vff den narren weg /  
Die wile aber / wir all nit wend  
Gedencken / wo eyn yeder lend  
Vnd leben blyntzend in der nacht  
Hant wir keyns rechten wäges acht  
Das wir gar oft selbs wissen nitt  
Wo vns hyen füren vnser dritt  
Dar vß entspringt / das vns alltag  
Berüwen all vnser anschlag  
So wirs erfolgen / nit on we  
Begeren wir nit mynders me /  
Das kumbt alleyn dar vß / das wir  
All hant eyn angeborne bgir  
Wie vns das recht güt hie vff erd  
Bekum on vâl / vnd entlich werd /  
Die wile aber das nit mag syn  
Vnd wir irren in vinstern schyn  
So hat got geben vns das liecht  
Der wißhyt / dar von man gesicht  
Die macht der vinsterniß eyn end  
Wann wir sie nemen recht für hend  
Vnd zeigt vns bald den vnderheit  
Der doren weg / von der wißheit /

t .iiij.

